



# Kayuhan untuk pesakit di IJN

Oleh Mohd Sah Muda  
bhvarsiti@bh.com.my

Mersing

KEJAYAAN  
TAHUN LALU  
MENDORONG  
PIHAKNYA  
MENERUSKAN  
ACARA AMAL  
ITU DENGAN  
MENYASAR-  
KAN KUTIPAN  
RM10,000"

**Khuzaini Norma**  
Pengarah Program

Kira-kira 100 pelajar Kolej Perdana, Universiti Teknologi Malaysia (UTM) menyertai Program Kayuhan Kibar Jalur Gemilang Trans 1Malaysia Ride 4 Unity.

Kayuhan sejauh 1,800 kilometer (km) itu bermula dari Johor, Pahang, Terengganu, Kelantan, Kedah dan berakhir di Perlis.

Program bertemakan ‘Sayangi Jantung Anda’ itu bertujuan mengisi tabung Yayasan Institut Jantung Negara (IJN).

## Kesinambungan

Pengarah program, Khuzaini Norman, berkata program adalah kesinambungan

Kayuhan Amal Anak Merdeka Trans 1Malaysia Julai tahun lalu.

Katanya, kejayaan tahun lalu mendorong pihaknya meneruskan acara amal itu dengan menyasarkan kutipan RM10,000 bagi membantu pesakit memerlukan di IJN.

“Selain berbasikal, peserta turut melakukan pelbagai aktiviti lain termasuk mendekati masyarakat setempat menerusi aktiviti gotong royong di sekolah terpilih selain konvoi mengibar jalur gemilang bagi memupuk semangat patriotisme.

## Pemakanan sihat

“Turut diadakan, kempen hidup sihat dengan pendedahan diberikan kepada masyarakat mengenai kepentingan menjaga kesihatan jantung dan amalan pemakanan sihat,” katanya ketika ditemui di Politeknik Mersing, baru-baru ini.



Sebahagian daripada pelajar UTM yang memeriahkan program berbasikal.



Peserta Kayuhan Kibar Jalur Gemilang Trans Satu Malaysia Ride 4 Unity “Sayangi Jantung Anda” tiba di pekarangan Politeknik Mersing.

**Bandar Baru Bangi:** Universiti Malaysia Perlis (UniMAP) mempertahankan kejuaraan kali kedua berturut-turut pada Kejohanan Golf Antara Institusi Pengajian Tinggi Awam (IPTA) Malaysia ke-41.

Kejohanan yang membabitkan lebih 200 peserta dari 20 universiti itu dan dihoskan oleh Universiti Kebangsaan Malaysia (UKM) diadakan di tiga lokasi iaitu Danau Golf Club UKM, Bangi Golf Resort dan Impian Golf & Country Club.

UniMAP nyata unggul dalam acara Gross individu dengan memungut pingat emas dan perak menerusi Roshaidi Ramli dan Mohd Shahrul Musa.

#### Gross berpasukan

UniMAP juga cemerlang dalam acara Gross berpasukan yang turut disertai Nazmi Sabu, Basri Basir dan Prof Dr Salleh Abdul Rashid selain Roshaidi dan Mohd Shahrul.


Pingat UniMAP seterusnya disumbangkan oleh Ahli Lembaga Pengarah Universiti, Datuk Shah Headan Ayob Hussain Shah yang meraih pingat gangsa dalam acara orang kenamaan.

Kemenangan itu membolehkan UniMAP membawa pulang piala pusingan dan piala iringan.

#### Bakat baru

Sementara itu, Naib Canselor UniMAP, Prof Datuk Dr Kamarudin Hussin, berkata kejohanan itu menjadi medan terbaik mencungkil bakat dalam kalangan warga IPTA untuk diketengahkan ke peringkat lebih tinggi.

"Kejohanan seumpama itu turut memberi peluang kepada semua peserta menjalinkan persahabatan dan meningkatkan kerjasama," katanya.



Aksi salah seorang peserta.



Sebahagian daripada pemenang kategori Orang Kenamaan.

#### INFO

##### Kejohanan Golf IPTA 2013

###### • Kategori Orang Kenamaan

- |            |  |
|------------|--|
| Johan      | Universiti Pertahanan Nasional Malaysia (UPNM) |
| Naib johan | Universiti Teknologi Malaysia (UTM)            |
| Ketiga     | Kementerian Pendidikan                         |

###### • Kategori Tetamu

- |            |  |
|------------|--|
| Johan      | Universiti Sains Islam Malaysia (USIM) |
| Naib johan | Universiti Malaysia Perlis (UniMAP)    |
| Ketiga     | Kementerian Pendidikan                 |

###### • Kategori Gross

- |            |                                      |
|------------|--------------------------------------|
| Johan      | Universiti Malaysia Perlis (UniMAP)  |
| Naib johan | Universiti Kebangsaan Malaysia (UKM) |
| Ketiga     | Universiti Putra Malaysia (UPM)      |

###### • Kategori Nett

- |            |                                      |
|------------|--------------------------------------|
| Johan      | Universiti Utara Malaysia (UUM)      |
| Naib johan | Universiti Malaysia Terengganu (UMT) |
| Ketiga     | Universiti Teknologi MARA (UiTM)     |



Aksi seorang peserta yang menyertai Kejohanan Golf IPTA UKM.